

古田縣志卷之二十九

獨行傳

十步之內有芳草十室之邑有忠信詎百里巖疆自唐迄今而遂無狷介自好之士踵生其間砥節勵行以猶善其身耶簞食豆羹見於色者未足與語睦婣任卹之事久矣遑冀其能興廢舉墜解紛排難哉有人焉反而行之得亦不謂之一鄉善士乎若夫石隱者流以林泉爲性命以詩酒爲生涯似無所表見矣然其肥遯鳴高泥塗軒冕之概亦足使貪夫鄙夫聞之而奮改者皆不可以無聞焉纂獨行傳隱逸附

宋

古田縣志

卷之二十九

獨行傳

一

林德鳳字鳴岐性樸厚不事機智歲大疫惠心施藥賴以存活者甚衆年九十三世稱爲仁厚長者

蘇大瑛字世傑開禧元年特奏名授秘書省正字與伯兄大璋齊名祖師聖居鳴玉灘頭平沙堂卽今縣署迄大瑛凡三世先是縣未有城縣署在雙溪上流太平興國中遷水口端拱元年轉運使崔策議復舊治卜地曰平沙堂良邑令以蘇宅爲難雖屢造門欲語囁嚅久之大瑛聞之歎曰吾一宅良孰與一邑良且吾有宅能利一邑而邑令不敢爲吾言其以吾爲何如人耶遂詣令自白願讓宅爲縣署令喜乃以雙溪故廡爲之貿由是邑之士民皆稱盛德以爲大瑛眞義士也及卒邑令祀之署後以

志不忘但歷世既久遂訛傳讓宅事爲蘇公大璋清光緒間邑令徐承禧曾撰蘇公祠記以正其誤已附入祠廟志矣茲不再錄

明

林堪字應舉布衣仗信義識權變邑向無城堪獨力計畫詣闕請城賴以成嘉靖初賊首周馬良構亂叅議魏棨知堪有俠氣令往諭以禍福賊卽解散嗣復叛御史王以旗疏請勦捕經年弗獲堪復詣壘開陳化諭馬良感泣歸命鄉井獲安

張泗字子文性高雅且善詩有自雪水挈妻孥來者後夫婦俱疫死棺瘞之且爲鞠其孤又瘞客死之骼十有九槽拾遺金待其人還焉公田爲兄私鬻始終不道及外舅某病甚潛納金泗袖中後即以金還其子亦不令舅知也鄰有屠豕欲甘心於子文解之曰我有杯酒共罄之可乎其人爲愧謝去隱箬溪以吟釣終其身邑令楊德周欲延致賓筵以耄辭不赴年七十有九子極食餼有聲亦能詩

丁文湜字本清其子與隣人出樵溺水死或言隣人推之喉使聞於官湜曰修短有數竟無異言

湯德字慎齋貢生性端慤有古君子風里人欽之
余珏居邑東路上村性長厚無私曲生平不欺一人人亦莫敢欺之或有累年訴訟官不及斷者片言立剖毫無遁情邑令廉其

實予以竹板二使治一村之事後有不直者輒責三十嘗自署一聯云有理有倫五百家太平仙府非官非吏三十板公道衙門

林國模字允範慷慨好施親隣待以舉火者甚衆子撰字養純亦能繼父志見人有因財爭鬪者捐資爲之排解有童子遺物反覓不見泣於道歸以己物與之父子俱以敦厚享高年模年九十有六撰年八十有五

余克守字秀齋天啓間修行於鄉讀書不干他事鄉黨稱爲長者年九十三無病而終

林毓材字際亨性任俠緩急足恃素能文崇禎末天下多事遂應

古田縣志

卷之九

獨行傳

三

武試邑有寇警募能捕者毓材應募守杉洋雙溪時寇魁羅一劫掠民無寧居守備某聞毓材名委以勦賊竟率兵往擒之邑城圯於雨毓材戚然曰邑無堅城寇來奈何鳩貲葺之不踰月城竟完邑令聞於上官曰此義舉也義與城俱不朽矣旌之徐通字閩田主簿性慷慨不吝解推喜結客傾樽投轄傳爲美談余文龍解組後飲其家曰人言姑丈豪舉至老不衰果然卒年九十有六

余兆元字貞復性端方有幹濟才人不敢以鄙事干之遭時多難焚筆硯從軍於江甯官校尉

林志政字明沙諸生性嗜讀嘗築室藏書扁曰貽遠有盜夜入其

室志政覺而謂之曰汝以我廩有餘粟箱有餘衣囊有餘財乎不知我之所有僅此數卷書耳然汝亦爲饑寒所迫至此我尙有斗米備晨炊者汝其取之盜愧謝去後亦改過自新終身感之

楊應鳳性慷慨好施與明末山寇蜂起邑西城悉圯難以守禦應鳳捐銀五百砌造計百餘丈鄉人德之

鄭之特字子翹丙戌貢生授戶部主事爲人豪爽有大志傾貲結客任俠尙義黃周星主其家者數年人以孔北海目之

鄧遜字祖生原名迪字九行諸生工詩賦及古文辭富膽識喜談天下事嘗曰士不審星日雲物之常變不辨山海邊塞之險要

古田縣志

卷之九

獨行傳

四

吾不知其所讀何書也時明事日非遜悲憤不自己或痛飲酣歌忽泣忽笑人第以爲酒狂崇禎甲申之變作哭都城十章及乙酉丙戌遜筮之得姤之遯釋策大慟曰姤陰其方長乎遯六月之卦也當有避地之役未幾清師入閩遜隱於建安之迪口自號蓼溪釣客蓼溪者迪口溪名也初遜與黃龍談兵甚相得龍貴後以書招之不赴寄一詩以明志終身不入城市及甲寅耿變遜爲寇所殺後延郡守迹得殺遜者寘諸刑

藍倬默字識之崇禎間選貢任處州同知時軍興旁午罄家貲千金助餉聞李自成寇京師憂憤不能寐謂其家人曰時事如斯苟祿奚爲遂解組歸及清定鼎舊官例得起用隱處富達村不

復出

清

陳文義字世虞素持齋好行善事凡橋路寺廟之頽壞謀之義無不樂與修理者小熙嶺橋梁膨裂義曰此往來孔道可任其終圯乎遂捐貲構材出任規復一日督役道旁有鐵索持符至者問義名即鎖至官官亦不容辯禁繫之匝月外郡來文犯獲矣而義以釋蓋特與義同姓名也邑令郭某知其賢書匾勞之曰德義有聲義至家歎曰吾以與犯同姓名不能出一言以剖真一世之愚也遂改號曰世愚後禮部官余廷珪爲之立傳於其家乘

古田縣志

卷之九

獨行傳

五

丁正彥字子弼明季邑屢有寇警正彥年尙幼亂離中頃刻不離父側經變旣多更事亦富旋因海氛未靖遂杖策從征以軍功任尤溪教諭精於鑒士歸里後以里甲宿堂大爲民累言於當事罷之

葉厚秀字向春號日華順治戊子山寇作知縣甘體垣禦之厚秀率鄉社百餘人入城協防寇潰邑賴以安授把總鎮杉洋殘寇李君榮竊發厚秀引官兵捕之有司將以功薦力辭之其從弟伏祖亦人巢斬賊授千總後升叅將康熙甲寅耿變官山賊劫厚秀勒餉挾以行其三子連豔年十三賫銀往浦城救父以身留質賊嫌餉少竟遇害人稱爲孝子云

鄭畿字方千順治丁酉舉人任山東萊州司理清介有守有某紳前任古田頗不直公論至是里居爲仇家所陷因袖金求解畿力却之卒直其事逾年以裁缺例宜調知縣畿曰吾已重聽尙耐煩劇耶拂衣歸值耿變不污僞職遂入山以老云

林常登字毓雋諸生甲申殉難主信之次子也亮直有奇氣耿逆之變污以僞職不受僞令翁姓者庭脅之常登奮然曰爾不明順逆旣以自穢復欲污我清白耶遽前推其案吏役亦氣爲之靡遂偕長子首選繫至省逆黨雜鞫之讞定致命有日矣獄卒梁伯五者心義之弛其禁假以楮墨因溯長林受氏以來忠義事作西河忠義錄以見志會清兵入得不死歸鄉後益以氣節

古田縣志

卷之九

獨行傳

六

自勵並以勵其鄉人云

魏應銘字五休明末傾家充餉授御前都校尉耿逆之變污以僞命不從欲殺之見其狀貌魁偉囚之獄有陳儀者常沐其恩導以踰牆走丁巳山寇聚五都南樓社兵攻之不克駐防劉國興稔知應銘才要與同往應銘不辭至則羣寇見之俱解散惟坑頭賊阮文恃衆不服鄉民斬其首級以降寇平將以事聞應銘笑曰吾不忍鄉民受賊害甯爲官地耶詩酒自娛於家休養以終

丁垂嘉字爾賓諸生需次州判甲寅耿變屢徵就職垂嘉謂其兒曹曰儒者讀書當明大義安可妄以身許人耶遂匿山居亂平

好行其德取重鄉評

丁正奇字特人以增生納貲授州判赴京謁選值耿變奔歸汚以偽命不應

陳鴻任字飛卿有俠氣康熙甲寅耿變賊將吳安邦攻城其弟安定爲先鋒素驍勇先攻較場門鴻任提烏槍一發斃之賊憤攻城益急復連中十數人賊喪氣後以城中有內應南城陷賊大索三日鴻任突圍走賊平始歸不言前功鄉人義之

陳隆亨字其昌康熙甲寅耿變吳金二寇攻城援絕糧罄隆亨出家儲米數百石以濟急賴以存活者甚衆

吳駿字時來順治丁酉副貢僑居連江康熙十三年耿藩變起駿

古田縣志

卷之九

獨行傳

七

遁跡寶華山中迫之不應事平出爲甯羌州同知州本邊徼駿外捍內撫民懷其德以母老致仕

陳名燿字學朱以貢生授華亭縣主簿有惠政尋以病乞歸值歲歉減值平糶知縣某議立社倉輒先捐穀復捐田爲正音書院膏火後以其田充入義學

蔣啓秀字道盛監生谷口人也性慷慨乾隆四十九年谷口聯宦洋諸村告饑啓秀倡平糶議存活鄉人指不勝屈六十年又饑其子步雲無改父道復平糶三月民食賴以維持里黨推爲模範今谷口諸村每遇歲歉輒以平糶救濟實自啓秀始也又於墓亭聯宦洋諸處設水防灌溉鄉田於芝洋購隙地半里以供

貧人掩骼喪不能殯炊不能舉者輒賙之可謂積善之家世濟其美

黃封字敬執廩生好施與有戚某負人債謂主者曰爾第困我於黃氏門外使聞之債必償矣主者如言封果代爲償之嘗被竊捕之知寔人子更以錢資之曰速改行毋負我以自負也後果爲善士家素封然生平照丹桂籍行事卒食貧過劍津遇盜劫窘甚有睨之而前曰君非黃先生耶胡至此蓋卽封向所拯者出囊金贈歸

余自厚字守拙號存所監生好赴人之急戚某非罪被逮爲納橐鱣有嫠婦貧甚姑迫嫁之自厚周之以全其節長子廷珪嘉慶

古田縣志

卷之九

獨行傳

八

己巳進士次子廷琮三子廷璣俱附貢

錄省志

蘇景邵字康生以孝聞於鄉有司給匾旌之素驍勇力山寇鄭荷亂帶兵直搗龍華寨賊平復膺旌獎卒年九十四

丁正昌字世茂恩貢輕財好施有負其債者鬻妻以償正昌聞而憫之捐金令贖後丁耿變被執劊掌燃臍不爲屈時論重之丁先正字君定任俠輕財歲歉設粥以活餓者復施棺三百餘具半坑亭金坑橋皆所捐造又倡建曹洋橋費踰千金歲久傾圮其孫某復募貲重修斯誠克承先志者歟

丁日耀字伯玉諸生慷慨好施與里有義舉靡不悉心爲之捐修文廟明倫堂磚瓦皆取給焉時人稱其有功學校云

林大振字德良諸生精研性理語類諸書爲陳清端公所亟賞天性肫摯搆支祠置祀田族人欽之善爲人排難解紛里有訟者得一言而釋由其信義有素也

黃銓字簡齋又字肇昌諸生性敦謹攻苦力學父早歿事母孝修葺祖墳創置祀典弱齡出繼不忘所生備盡子道素不喜僧道始終不惑其說生平樂善好施處族姓敦睦無間人稱長者著有學拙集詩文二卷

趙長翰字宗侯少貧輟舉子業以勤儉治生家漸饒有負其債者稔其窘迫取券焚之無德色父未葬獨力任之不以誘他兄弟年八十餘子孫蕃衍以爲厚德之報

古田縣志

卷之九

獨行傳

九

林鼎發字尹起家貧與弟鼎興共營生議授室鼎發曰吾弟弱恐不壽娶宜先素與清軍局韓良厚良戍關中貧無所措鬻園盡其價贈之良在戍未歸其父歿復爲之殯卒年九十

丁名陞字績臣需次州同性豪爽戚族中有喪葬婚娶力不能給者貲助之歲歉平糶以惠貧民捐社穀以裕倉儲上官以好義之風表之

高士明字華東善事寡母友愛弱弟歲歉減價平糶年七十三兩與賓筵

丁名揚字翼臣國學生性友愛不私貨財族間有爭忿者片言立解兩值歲歉減價平糶復捐社穀有司義之

張建烈字承祚國學生年十七父飛鳴兄昌璜諸生以族人命案
事株累建烈惻然請代繫囚上官廉其實釋之兄弟皆好施與
遇歲歉減值平糶族黨義之均以壽終

林登墀字丹宸太學生赴秋闈未售性正直輕財仗義凡邑當代
名人豪士以及方技名流無不與遊吳公珙陳公瓚時造訪焉
其尤密者如同邑陳正樂余天民盧朝鼎陳惠芳輩皆一時英
俊生平不以聲勢凌人見有冤抑者則代爲伸雪並不使人知
以市德故義聲聞焉著有楓堦詩草

余能協職員常爲鄉里排難解紛有貧乏者不吝己財與之子定
山諸生早世媳陳氏孀守嚴課其子教媿斷機後子葆真食餼

古田縣志

卷之九

獨行傳

十

貢明經皆遵母訓之所致也

林爲龍字瀾友國學生使氣任俠見不平事即義形於色至人有
緩急雖傾囊贈之無恡惜豪放不羈酣歌縱飲

黃龍光字啓見弟早歿遺一孤龍光視之如子爲婚娶分產給之
性平恕好行其德鄉人稱之

阮明武幼習舉子而於貨殖事多億中及家饒悉公諸弟輕財任
俠隣近有不平事得武片言輒解釋

湯錡字彝器國學生尙氣義慷慨好施與恤貧乏解紛排難不遺
餘力自處極儉樸鄉黨重之

曾上璋字文煥康熙間人嘗捐資立義塚十五處瘞死骸二千四

百餘施棺以助貧不能葬者有司以榜旌其門

鄒夢卜字予徵諸生有義氣先是都圖徭役不均力爲籲請勻派鄉人德之年九十六子式廓增生亦年八十二

余姒年字夏正國學生樸誠自矢或有以硜硜病之姒年曰稽阮一流人亦是天分極高者方得做來勉強學步徒失其故耳嘗自言勤儉二字不啻在治生我輩讀書窮理非勤非儉則必貧困至於貧困欲爲善則自苦欲施德則無資既有礙於己亦何益於人哉同時江南俊是其言

丁麟光字瑞公國學生輕財好施親族待以舉火者甚多遇歲歉減價平糶人稱其惠

古田縣志

卷之九

獨行傳

十一

丁正強字升亮性篤厚父百宜年八十餘奉侍惟謹鄉人稱之
丁裔字克□伯仲相友愛捐金施棺減值平糶卒年八十有六人頌其德

余殷年字地正諸生狀貌雄偉仗義好施遇官民有急不惜傾囊應之酷愛金石遺文收買數千卷暇則課子孫讀書教以禮讓嘗曰積金不如積書不如積德識者避之年八十一而卒
游原字耀公國學生急公好義減價平糶以濟鄉里樂捐社倉以裕公儲邑令嘉其義贈以匾額年六十四卒

藍倬勳字翹公廩生素孝友有文名時邑童子試多有冒籍冒姓諸弊倬勳輒首揭之有楊氏冒姓入場太守拔列第一倬勳請

學使究其事太守袒楊氏召倬勳詰責倬勳據理以對神色自若事亦寢其不畏強禦類如此生五子在庠者四

張志和同弟太和性篤厚俱以信義稱於時嘗與里中曾元禮合貲經商由太和綜理賑務三人和衷共濟生意頗發展嗣元禮中途不祿家有寡婦余氏幼兒雲龍無所依託志和兄弟憐憫備至視如同胞嫂姪一舉一動必以禮不特生意照舊公共而且雲龍家務無不悉心料理撫至雲龍成立始與議分店時店中貲產豐富尤擇田屋之較優美者分給雲龍里黨重之

徐燧字登爵號午亭父茂明重然諾好施與既歿燧年僅十九家貧其事繼母及生母撫二弱弟以孝友稱迨治產致富爲遠世

古田縣志

卷之九

獨行傳

十二

祖置祀田以贍族與族人某因貧不能自存將自經燧救之賑以資使事生業遇貧乏疾苦輒施以飲食藥餌有鄉人某父子相抱哭聞之知將鬻子燧出貲贈勸勿鬻有廉吏陳某歿於官已殯矣或言其棺能損骸燧出棺請易之邑有天地會聚衆斂財幾數千人邑令聞而逮之有簿爲燧所得令迫使獻將按籍處以重辟燧焚其簿自詣庭請罪令亦義之置不問善書有趙

松雪筆意

陳希添字則高慷慨樂施人有不平輒代爲聲雪壽九十有一親見五代同堂

陳雲字步五諸生好行善舉時有孤兒秦某無以爲家雲憫之出

貲伙助爲謀商業後秦某貨殖致富一家均感其德享壽八十有三

陸其美滌頭村人勤儉治生置田二千餘畝有一次身穿破衣來城適見各紳董在街市勸募建築孔廟緣銀就詢各紳董曰農人亦得預捐否衆答之曰可遂慨然樂捐一百兩即向城中某富家先手交付而歸

陸家璧滌頭村人性慈惠好施與精通內外醫科常購備上等藥品監製丸散以濟貧病先世家頗裕有負欠租穀債票之戶若令璧索取輒效馮驩焚券以債賜諸人嗣家人知悉不敢令索但鄉里知璧性慷慨遇窘急求璧立票貸借無不允許十數年

古田縣志

卷之九

獨行傳

十三

間代人賠償將抽長田產悉數估變毫不吝惜人咸義之

盧澄清號蔚潭字貽炳邑增生品行端方學問淹博設塾授徒垂五十餘年誨人不倦負笈從游盡城鄉知名士孝廉丁上達丁上道昆仲皆出其門時有名師之稱其弟潮清子承恩孫建祺曾孫景湘悉擢成均元孫世恭世延世深俱大學畢業世代書香人咸謂其實心作人之報

蘧振鏞字諧笙號春揚諸生生平績學手不釋卷富鈔本所爲文全從經籍醞蘊而出規行矩步寡言笑爲名師鄭其忠高弟師歿以文就正於謝銘勳山長詫之曰命中之技嘗與翁廷玉謝維駒維駱諸名輩結社論文輒執牛耳授徒數十年造就人才

多顯達

陳士善號九州從十七都歧杭與其父遷居縣城奉親至孝待友必誠嘗以勤儉謹慎訓示子孫好行善凡育嬰助葬以及修理橋梁道路無不唯力是視子起興例貢能繼父志歷三十餘年無改於父之道副貢徐連中爲之題序以表其世德作求
丁日照生平經營商業性誠實好行善事北鄉天王橋及縣城后林境百善社義塚皆倡募建造晚年持齋念經壽八十餘
丁漢奎字西斌天資穎慧讀書過目成誦弱冠補弟子員清咸豐己未恩科與其弟灼奎同領鄉薦益致力於經史百家之學奈累上春官未入南宮年五十餘大挑一等補用廣東知縣充同

古田縣志

卷之九

獨行傳

十四

考試官有某生文極佳但篇中有誤字爲改易之成全其美揭曉後某生晉謁聞而感之卒登翰林查係閩督許應騫之甥世閱也候補年餘有友人告粵督撫貪污非累費千餘金無以得缺但素性骨鯁嘗謂吾讀書至老挑選知縣猶須納金以鬻是終貽銅臭遂決計歸里承邑令聘掌教奎光書院培植士彙不遺餘力並爲人排難解紛鄉里蒙其德者均稱贊不已生平言動不苟尤以勤儉自勵布袍素食裕如也雖晚歲積有微產猶是力節奢靡以垂家法

丁灼奎字宿卿少時資稟魯鈍讀書非二三百遍不能成誦乃勵志攻苦卒成舉子業清咸豐己未恩科與其胞兄漢奎同登賢

書子桂芳諸生文筆尤健咸推跨竈隨侍其父在上杭縣教諭學署該縣文風極盛蒞任伊始人士卽呈送課文百餘篇請爲刪改命桂芳尅日改正出示闔學極爲拜服且得兩愜意門生留署課讀後一某生由翰林官知府一某生亦登進士第惜只送一考遽卒於官所得學俸喪殯費盡數年桂芳亦隨故天之困阨文人可爲喪氣

余祖昭字德夫善屬文狀魁梧奇偉清戊子科舉人大挑二等授仙遊縣學教諭未赴任旋赴京截取分發江蘇直隸州州同署崑山縣知縣愛民如子卓有政聲民國光復解組而歸凡鄉里有爭執者多歸決焉其有因財相持不下輒陰措己資以解之

古田縣志

卷之九

獨行傳

十五

調卹貧乏亦不遺餘力性篤孝於兄弟亦極雍睦

陳式金字小品廩貢品學純粹生平耳不聽惡聲目不視惡色肆力古文不尙時藝年五十餘邑令陳縣試拔取案首又十年學憲崑歲試一等二名食廩餼邑何鼎書匾額以旌之曰守正不阿真實錄也

林麗煌字南邨歲貢生學問淹博品行端方爲邑中名宿生平一舉一動必循禮法於勤儉二字尤極注意嘗曰勤能補拙儉以養廉吾儒必從此做起可徐底聖賢地步授生徒必以經史爲根抵以器識爲先務城鄉從遊者甚衆年七十二無疾而終長二三子均有文名時人目爲崑山軾轍云

陳朝楨字仿周清光緒己丑恩科領鄉薦次年卽受汪邑令聘掌教奎光書院嗣補尤溪縣學教諭培育士彙不遺餘力有黃生春芳家貧充學胥楨見其聰敏公餘授以課學計二載錄取邑庠清季罷科舉興學校尤邑人士留爲興辦兩等小學並推舉爲校長經五年始歸生平天性孝友在尤所得學俸均寄奉其父母收管於諸弟極肯退讓以自己所得封典晉贈其祖充育嬰局局長多載存活女嬰甚多至外事一毫不干年六十六歲病篤之夜其家瓦屋上有異光上騰對宇居人見之甚悉

徐際元字蓉軒清甲午科舉人授甯陽縣學教諭善屬文精韻學延師教授子弟凡誦讀字音稍差輒舉字典以示徵證一門俊

古田縣志

卷之九

獨行傳

十六

秀濟濟食廩餼者七八人長子秉衡清季特科優貢文望卓著授汀州上杭縣知事晚年詩酒自娛不干俗事人皆稱其純篤孝友崇重文教施家有政故得安享清福

江懷珍字聘三清光緒乙丑恩貢署甌甯縣學教諭善屬文倚馬可待設館授徒歷四十餘年東鄉諸生多出其門性公正鄉里遠近有爭執者均造廬請其談判無不折服

徐應昌字少文增貢生篤學勵行素性耿介誘掖後進不遺餘力每見人子弟聰敏善學極加推獎以勗其子姪省進士陳瀚年來古敍族謁其家待遇年餘時值嚴寒解裘以披其崇重斯文類如此以故其家世有文名且侍奉繼母極篤孝養晨夕進甘

旨無缺年五十餘猶依依孺慕

楊文銓號瑞英生平謙恭禮士好行善舉倡修金仙嶺后柴橋兩次調恤貧乏唯力是視御前侍衛楊景昌出任四川武職皆文銓措資接濟後感其德到川極表歡迎款待子葆康諸生有文名兼精日家

鄭其清字心澄增貢生幼聰穎弱冠卽補弟子員科歲試多列一等以廩缺滿只得補增廣生設絳授徒拔貢林榮桐諸生翁學瀾林維周皆出其門家訓敦儉樸次子鄭調元廩生四子鄭調燮邑庠人稱爲家學淵源

程鵬搏字海秋諸生博通經史善屬文授徒講學督課綦嚴門業

古田縣志

卷之九

獨行傳

十七

稱盛性孝友遇父母病親侍醫藥達旦不寐習以爲常寡嫂幼姪及二仲雖已分爨有不給處輒將所得學俸分卹以故年四十餘尙未娶後經親友婉勸始配邑紳陳祺次女未一年遽歌鼓盆續娶陳氏生三子年七十三而卒

陸祖庚改名瀚琦字愧吾家貧讀書無以爲給乃闢所居漈頭村屋後山場砌嶺鱗塍拓爲田畝種植桐茶蔬菜並播山稻兼課生徒以供生活精陰陽術數學凡堪輿卜筮推命兼擅其長而於擇日尤得奇門法問者接踵而至所得資悉以購置書籍架積十數層分門別類箋帙井然嗣厭問者之煩閉門謝客遍覽羣書每焚香撫七絃琴倚歌而和顏其居曰樊圃又曰昧嶺蓋

取山居養晦之義人皆呼昧嶺先生惜生平著述所藏書籍故後歷遭土匪蹂躪只得檢尋手撰蠹餘集一部計三冊

余材枝字仲良天性醇篤氣質和平不特宗族鄉黨稱孝弟卽交遊間無不通有無濟緩急以信義爲重少時讀書以資稟優美不甚用功年十九受業江懷珍門下始發憤府試取案首入泮嗣師事省垣進士林元賡補廩清光緒丁酉科選拔貢分發廣東署樂會縣知事卓有官聲民國光復後以體弱多病歸里休養排難解紛不遺餘力每爲人息事輒解囊賠墊年四十九而卒閭里哀慟備剛鬣赴靈哭奠者不下數十鄉洵一邑善士也陳廷鑣字芸拱增貢生善記憶讀書過目不忘初師事翁詔九林

古田縣志

卷之九

獨行傳

十八

南邨諸名宿入泮後與鄭調元林榮桐等結社同受業省垣何振岱夫子所撰課文贊爲命中技科舉一罷以貨殖才經紀商業倡立商會歷任會長職承陸軍團長田順昌縣長孔憲洛函請招撫藍幹堂鄭威明部隊投誠事成閩督給賞六等文虎勳章每談論古今終日不倦頭頭是道城廂育嬰局經費短絀除自己倡捐外復協力勸人捐助以故近六十歲疊生三子人謂慈善之報如響斯應邑重組修志局陳元璋縣長聘充分纂惜志稿未全璧傷賦鵬鳥不無遺憾

翁學瀾字鏡波增貢生性敦厚謹慎英年銳意科名與林榮桐鄭調元吳銘新陳廷鑣葉樹桐鄭希濂葉樹棠徐培澧陳漢襄陳

世英等計十一人顏曰襄社同受業省垣名師何振岱將所撰課文按期郵寄刪正科舉告罷始輟又吾邑組合詩盟廿四人顏曰蘿社欲以詩學誘掖後進實推中堅以執牛耳生平不干外事在家設絳授徒并精研醫學親友家遇有病恙延請便至活人頗多不取醫資陳前縣令元璋重組修志局初任總採訪職務迨分纂葉樹棠病故兼任厥職奈志稿將垂成竟赴地下修文同人均爲歎惜

池拱星號炳釗字庚垣性篤厚少受庭訓繼師事林南邨夫子善屬文書法秀勁弱冠卽舉弟子員科舉罷後爲戚某經紀財務歷十餘載極表信用對朋儕通有無濟緩急悉得其當母患偏

古田縣志

卷之二十九

獨行傳

十九

枯疾時尚未娶凡洗滌下裳倒瀉房桶躬親勞役十數年無弛怠邑提倡設立佛教會功德林不惜籌墊鉅資尤爲難得曾益謙字牧堂世家子也績學善屬文年二十遊邑庠家頗小康好施與凡遇典質田物者來願歸斷恒勸之曰產業一經絕賣後之子孫雖有力亦莫能取贖子若急需我有餘錢可以相贈以是人皆德之惜年僅三十一歲而卒

隱逸附

五代

余軒一名球仕南唐李氏爲尙書法曹以時政衰敝解官歸杉洋村營別墅濬池植竹以終其身嘗有句云煎來前社茶芽白釀出新春酒味酸朱檻柳垂金縷細碧波魚躍錦鱗斑其怡然自得有如此

宋

李仲通先儒延平之元孫也遷古田石平村性明敏每泛舟江濱以釣爲業自號秋江漁父及卒里人輓以詩云久矣厭塵世逃名雲水鄉五湖正覓地一曲歌滄浪風雨晚來急笠簑時下忙

古田縣志

卷之九

隱逸

一

釣龍手中竹分付與兒郎恰稱幽人風致

李子淳字亨大仲通孫也性恬曠種竹一區開窗其中嘗曰竹圓而直勁而節煖不甚榮寒不改色吾始種之友人以爲無益及與居則見一塵不染翠色常在時乎風生金玉之聲鏗然盈耳至於詠詩彈琴大有所助乃知古人愛竹蓋有由也因自號竹窗居士以高隱終

明

陳廣字伯遠無書不讀授徒多所成名莊嚴林聰嘗受業焉聰旣貴爲少保寫書於廣謂空山無人水流花謝非語言所能形容著有詩文數卷

黃童字仲器永樂聞以善楷書徵入文淵閣繕寫大典書成例當拜官以母老丐終養後累徵不起

陸懋瑛自號書津樵者於天順成化間入山不出

五泉廬明季有逸士五人隱此人問其姓名笑而不答邑人余天民詩云城北有五人明季之逸士國運當陽九因獨行其是遁跡五泉廬終身遠城市詩酒盡餘年至今無姓氏有客過其址五泉得四泉一泉在何處應與陵谷遷嗟彼五泉廬荒涼年復年一泉何足惜萬事同逝川昔之五泉廬今爲種菜圃種菜者爲誰荒園又無主寒鳥啼啾啾一樹梅花古梅花香可不與草木腐

古田縣志

卷之九

隱逸

二

高國定字一甫貢生博通風雅尙氣節當明末秦晉楚豫俱爲盜區而朝臣立門戶始終不解因慨然曰今南北交訐在廷無一忘身發憤紓君父憂者天下事去矣崇禎甲申後潔身不出與從子奇世科自相師友以吟詠爲事風雅萃於一門

周鳴鐸字木生崇禎丙子舉人甲申後屢徵不起築一草亭以詩文自娛里人敬而頌之有人間高士宅天上少微星之句其從子偉歲貢亦能詩

林東向字育我有隱德不仕與高瑞伯郭彥定訂世外交鄧逖贈詩有不效商山叟輕履漢家廷之句

高瑞伯以字行積學能文崇禎甲申後率妻子躬耕隴上有古鹿

門風

郭彥字中夫能詩以修城功撫按上其事賜冠帶以義與城存旌焉明亡不仕喜畫石竹隱於嵩州

郭奇字正夫諸生明亡後不出與高伯容高希珍朱海望林世臣張愿甫包克繩林祿中山居唱和終世外交

周鼎臣字允輔諸生崇禎甲申後未嘗與賓興卜築屏山之下
匾曰修竹人家